

FURLANISCJ E AUTONOMISCJ, VUIDÂTS DAL RETÔR HONSELL, A DIFINDIN LA LEÇ SUL FURLAN. MARTARS AI 29 UN INCUINTRI

Vonde ai atacs cence fonde

L'intent al è chel di rispindi aes obieziions dai tarizadôrs de leç e di clamâ adun i parlamentârs furlans e i aministradôrs regionâi par che le difindin. Massime a Rome devant dal Guvier

VONDE ATACS strumentâi ae gnove leç regionâl su la lenghe furlane. Lu disin Universitât di Udin, Comitât pe autonomie e il rilanc dal Friûl, Comitât 482, la Vite Catoliche, Radio Spazio 103 e Radio Onde Furlane, sglonfs de aggressivât di cetantis fuarcis politichis e sindacâls locâls cuintri la leç regionâl, di fat, un atac ae diversitât linguistiche che e caraterize il Friûl-Vignesie Julie.

Par marcâ la inconsistence di chestis posiziions, plui ideologjichis che altri, lis rapresentancis furlanis, cun, a cjâf, il retôr de Universitât dal Friûl, Furio Honsell, a àn convocât une conference stampe par martars ai 29 di Zenâr, aes 11 di matine, li de sale dal Consei di palaç Florio a Udin. L'intent al è chel di rispindi, pont par pont, aes obieziions dai tarizadôrs dal gnûf strument legislatîf e di clamâ adun i parlamentârs furlans e i aministradôrs regionâi par che lu difindin cun fuarce. Massime a Rome, devant dal pericul che il Guvier talian lu impugni denant de Cort Costituzionâl, tant che e à domandât par esempli, di resint, la segretarie regionâl

de Uil e chê de Uil scuele dal Friûl-Vignesie Julie cuntun document mandât ai ministris pe Istruzion e pai Afârs regionâi, Fioroni e Lanzillotta, e al sotsegretari de Presidence dal Consei, Letta. La leç e sarès incostituzionâl e e presentarès un conflit di competencis. La incostituzionâl e vignarès dal mecanisim che la leç e previôt pai gjenitôrs che a àn di declarâ se a intindin valêsi o no dal insegnament de marilenghe pai lôr fis. Il conflit di competencis al sarès leât al sisteme di reclutament e formazion dai insegnants, cun violazion de autonomie scolastiche. Dulinvie de conference stampe, i siei organizadôrs a marcaran cemût che la leç regionâl no discrimine ni insegnants ni students. Se no vignis metude in vore, duncje, no sigurant tes scuclis l'ûs dal furlan previodût de leç statâl 482/99, a saressin i students furlans a jessi discriminâts linguisticamenti.

Martars si fevelarà ancje de programazion sperimentâl in lenghe furlane tai spazis regionâi de Rai, che e varès

vût di partî cui 7 di Zenâr, mai inviade. I uficis ministeriâi a vevin sigurat che il projet pilote, concuardât tra Rai, ministeri pes Comunicaziions, Region e rapresentancis furlanis, e sarès tacât drenti de fin di Zenâr. Invezit, daspò dal ultin incuintri che l'assessor regionâl ae Culture, Roberto Antonaz, al à vût li dal ministeri a Rome lunis ai 21 di Zenâr, al somee che drenti dal mès si sieri la tratative e che, drenti di trê setemanis, si partissi cu la sperimentazion. L'acuardi al è stât cjatât su dôs trasmissions radiofonichis in di su temis di atualitât, cinc dis par setemane e in fassis di grande scolte, e une trasmission setemanâl di mieze ore par television. Ancjemò di definî i oraris, ma ancje durade de gnove programazion e cui che al à di paiâ lis trasmissions e trop. La sperimentazion e varès di pesâ pal 60 par cent su la Region, pal restant su la Rai.

L'impuartant al è partî, sigûr, ma ancje lavorâ par che il projet nol mueri li. Par chest, «te Convenzion pes trasmissions par sloven e italian tra Consei dai ministris e Rai, di rignuvî, a àn di jentrâ ancje chês in marilenghe», al marche Arnalt Baracetti dal Comitât pe autonomie e il rilanc dal Friûl. «La Region – al bat – si attivi».

ERIKA ADAMI